

## EPESUS

### Pol Epesus Binib Kilop Mij Tikak

<sup>1</sup> Yad Pol. God niñid yip aglek, bi Klays Jisas takaw nop dad ameb ak midebin. Pen nibi Epesus binib God yil midil, Klays Jisas nop chig tep gil okok, miñil yad nibop mij tikebin. <sup>2</sup> Bapi God chin ayip Biawl Jisas Klays ayip, apilminal ak nibop yimug niñid gitep gel midtep ginimib.

*God Klays nop agyokek apek, tap telep ne chinop ñil ditep yibil gup*

<sup>3</sup> God, ne Biawl chin Jisas Klays nop God ne mideb, Nap ne mideb. Ne Klays nop agyokek apek nim, nop chigon, God tap telep man ne alan mideb okok chinop ñil ditep yibil gup. Anib ak tek God yib nop dad aplanigun. <sup>4</sup> Bilel bilel man ma alwol gilak ñin ak, God ne kili Klays nop chiginigabal agil, anigil gos nigak. Anigil nigeke, chinop aglak. Ne yad nigen binib suntep midil takaw ma mideb yenigel agil, chinop anigil aglak. <sup>5</sup> Ñin anib anep ne chinop mapen lil, gos ne ke niñid chinop aglak. Aglil agak, Jisas Klays kilop gek, ñapay yad okok yenigabal agak. God ne ke chinop gos nigeke nop tep gek, anigak. <sup>6</sup> Pen ñi mapen ne ak nop chigon niñid, chinop yimug niñid gitep gup.

---

**1:1** Apo 18.19-21, 19.1, Lom 1.1, 1.7, 1 Ko 1.1, Kol 1.1    **1:2** 2 Ko 1.2, Gal 1.3, Kol 1.2, Tat 1.4    **1:3** Epe 2.6    **1:4** Jon 15.16, 17.24, Lom 8.28, Epe 5.27, Kol 1.22, 2 Te 2.13, 2 Ti 1.9, Jem 2.5, 1 Pi 2.20  
**1:5** Jon 1.12, Lom 8.29-30, 2 Ko 6.18, Gal 4.5    **1:6** Mat 3.17, Jon 3.35, Lom 3.24, 5.15, Kol 1.13

Anib ak ne chinop yimug niñid gitep gup anib ak, chin pel gos niñid yib nop ak dad aplanigun. <sup>7</sup> God ne pelpel binib okok kilop yimug niñid gitep yibil gup. Pen chin nopun, Klays nikim sogek kumak tek, God ne chinop pisnep dek kim amon, tap si tap timel gipun okok tig walig giyokup. <sup>8</sup> Anigil chinop pelpel yimug niñid gitep gek, chin binib gos nigep okok midil, gos nigtep yibil gil midobun. <sup>9</sup> Bilel God gos nig dad amil agak, Kidek Klays tap oginap gek, gos yad pal ak oginap niñid gen yip tep ginimun agak. Ned gos ne anib ak we gil yoligup ak pen, miñil gos anib ak chinop yomub. <sup>10</sup> God gos ne anib ak anigil mideb, tap okok midupsek gek, am am mid dad amil ñin aglak ak apjakek, tap anib okok dil Klays nop muk okok linigab. Tap adekab alaŋ okok sek, lum awl okok sek, midupsek dap nan gil Klays nop muk okok lek, kod yenigab.

<sup>11</sup> God ne ke gos niñid, tap okok midupsek gilak. Pen bilel gos ne ke nep kidek niñid, chinop aglil agak, Klays ayip chigil yenigabal agak. Pen abe agak, Kili binib yad yibil ak yenigabal agak. <sup>12</sup> Anib ak tek, chin Juda binib, Klays nop ned kod midon apek kidek gipun okok, God nop yib awl ñil yib nop dad aplanibun. <sup>13</sup> Pen nibi binib Juda mel okok abe, takaw niñid yibil ak nigem, God nibop gek binib ne midebim. Takaw teplep anib ak anib agup, God nibop tig asik dup. Nibi Klays nop gos linigab jimñil midebim ak nim, God Kawnan ne ak

---

**1:7** Apo 20.28, Epe 2.7, Kol 1.14, 1.20, Hib 9.12, 1 Pi 1.18-19    **1:9** Lom 16.25, Epe 3.4, 3.9-11, Kol 1.26, 2 Ti 1.9    **1:10** 1 Ko 3.22-23, Gal 4.4, Plp 2.9-10, Kol 1.16, 1.20, Hib 1.2, 1 Pi 1.20    **1:11** Lom 8.17, 8.28-29, Kol 1.12, Tat 3.7, Jem 2.5, 1 Pi 1.4    **1:13** 2 Ko 1.22, 6.7, Epe 4.30, Kol 1.4-6

nibop ñub. Ned God ne takaw aglil agak, Kawnan yad ak binib yad okok kilop ñinigayn agak. Anib ak chin nopun, nibi binib ne midebim. <sup>14</sup> God ned takaw aglil agak, Tap teplep yad okok, binib yad okok kilop ñinigayn agak. Anib ak chin God Kawnan ne ak dipun okok, chin nopun, God tap teplep ne okok midupsek dinigabun. Anib ak tek chin nopun, God binib ne okok kilop pisnep dek kim amnigabal. Anib ak nim, yib awl ñil yib nop dad aplanigabun.

*Pol ne God nop agniñid agup, Kilop gos tep ñinimin agup*

<sup>15</sup> God nibop anib gek niñid, pen abe nepin, nibi Biawl Jisas nop gos liniñid, binib God yil midebal okok midupsek kilop mapen lipim. <sup>16</sup> Anib ak tek yad nibop sawl ma gil, nibop nen God nop agniñilig, tep agilig midebin. <sup>17</sup> Pen God, ne Biawl chin Jisas Klays God ne ak midil, Bapi teplep yib awl yibil mideb. Ak pen nop pel agniñid apin, Nad Kawnan nad ak kilop ñinimin, ne gek, kili gos nigtep gil, nep nigtep yibil ginigel apin. <sup>18</sup> Nad kilop gek gos pag yikan apin. God ne anigek niñinigabim, God nibop suk agil, tap teplep nibop ñek dinigabim ak kod midebim. Ne ned takaw anib ak agak, Tap teplep yad okok, binib yad okok kilop ñinigayn agak. Pen niñinigabim, tap teplep anib okok God ne binib ne okok kilop ñinigab ak, tap awl tap teplep yibil mideb. <sup>19</sup> Pen abe niñinigabim, chin Klays nop gos linopun okok, God ne chinop

---

**1:14** Luk 21.28, Lom 8.23, 2 Ko 1.22, 1 Pi 2.9    **1:15** Kol 1.4    **1:16** Plp 1.3-4, Kol 1.3, 1 Te 1.2    **1:17** Kol 1.9    **1:18** Apo 26.18, Epe 2.12, 4.4, Kol 1.12    **1:19** Epe 3.7, Kol 1.11, 1.29, 2.12

kiles awl ak pel ñub. Kiles ne anib ak, kiles awl yibil mideb. Miñil chinop pel ñub ak, <sup>20</sup> ned Klays pisnep kumak ñin ak, God kiles anib ak dil Klays nop gek tikjakak. Tikjakek, man ne alañ dad amil, ñin yipid kid ne okok lek besigil mideb. <sup>21</sup> Adek alañ besigup tek, ne abe Biawl yibil mideb. Ensel midebal okok midupsek, tap kiles adekab alañ midebal okok midupsek, biawl lum awl midebal okok midupsek, bi kiles midebal okok midupsek, kili nop muk okok midebal. Pen binib tap anib okok miñil midebal okok, kidek yenigabal okok, yib kili pi ak yek, yib ne ak adek awl alañ midakniñ, midupsek nop muk okok midebal. <sup>22</sup> God ne binib tap anib okok midupsek Klays nop muk okok lek, yib awl dil tap okok midupsek kod mideb. Anigek nim, Klays binib ne okok kimig won tek midil, kilop abe kod mideb. <sup>23</sup> Pen Klays binib ne okok, kili mubwak ne tek midel, ne mideb nab kili ayañ. Pen ne binib okok sek tap okok midupsek nab ayañ midil, okok midupsek mideb.

## 2

*Chin binib kumeb tek yonok okok, God chinop gek Klays ayip konim midobun*

<sup>1</sup> Nibi ned God nop kidek ma gil, tap si tap timel geligipim tek, God ayip jimñil midep tek ma lak ak, kumeb tek yeligipim. <sup>2</sup> Ñin anib ak, tap timel lum

---

**1:20** Sng 110.1, 2 Ko 13.4, Kol 1.16, 2.10-12, 3.1, Hib 1.3      **1:21** Lom 8.38, Plp 2.9-10, Kol 2.10, 2.15, Hib 1.4      **1:22** Sng 8.6, Mat 28.18, Kol 1.18, Hib 2.7      **1:22** Kol 1.18      **1:23** Lom 12.5, Epe 4.10, 4.15, Kol 2.9, 3.11      **2:1** Epe 4.18, Kol 1.21      **2:1** Kol 2.13  
**2:2** Jon 12.31, Epe 5.6, 6.12, Kol 1.21, 3.6-7, Tat 3.3

awl yil ak gos niñid kidek geligipim. Pen kicheki biawl ak ne adekab tap okok kod mideb ak, ne tap timel goligup ak geligipim. Kicheki anib ak, miñil ne binib God takaw tibilikipal okok kilop bak lil mideb. <sup>3</sup> Ned chin midupsek kili geligipal tek nep gil, gos chin ke niñid kidek goligipun. Gos chin ke nigup tek gilig, mapen ke tikjakup tek gilig goligipun. Chin binib lum awl tek goligipun ñin anib ak, God ne binib lum awl okok kilop timel niñid yul awl ñinimuj ak, chinop abe ñinimuj tek lak.

<sup>4-5</sup> Chin tap si tap timel goligipun tek, God ayip midep tek ma lak ak kumeb tek yoligipun. Ne pen chinop mapen yibil niñid, mapen awl yibil lup ak nim, ne chinop gek, Klays ayip konim midobun. God nibop yimug niñid gitep gup anib ak nim, nibop tig asik dup. <sup>6</sup> Pen God ne gek, chin Klays Jisas ayip tikjakil midobun. Gek tikjakon, dad man ne alañ chinop lek Klays ayip besig midobun. <sup>7</sup> Anigek chin nopun, yimug niñid gitep gep ne ak, tap telep awl yibil mideb. Pen yimug niñid gitep gep ne anib ak, binib miñil midebal abe kidek yenigabal abe kili midupsek niginigel agil gos nigup. Anib ak tek God ne Klays Jisas nop gos niñid, chinop yimug nigup. <sup>8</sup> Nibi Klays nop gos linigem, God nibop yimug niñid gitep gup anib ak nim, nibop tig asik dup. Kiles nibi ke gem nibop ma dup. Mel yibil. God ne nokom nibop nen agil tig

---

**2:3** Lom 5.12, Gal 5.16, Kol 3.6, Tat 3.3, 1 Pi 4.3    **2:4-5** Luk 15.24, 15.32, Apo 15.11, Lom 5.6-10, 6.4-5, 6.13, 10.12, Epe 1.7, 2.1, 2.7, Kol 2.12-13    **2:6** Epe 1.20, Kol 2.12    **2:7** Epe 1.7    **2:8** Jon 4.10, Lom 4.16, 10.14-17, Plp 1.29, 2 Ti 1.9, Hib 6.4

asik dup. <sup>9</sup> Pen God nibop tig asik dup ak, nibi wog olap gem tig asik ma dup. Anib ak bi olap yib ne ke dad aplanimun tek ma linigab. <sup>10</sup> God ned chinop gos nigak ak, ne kili kidek wog gitep ginigel agil gos niñid chinop aglak. Kili wog anib okok aniginigel agil, miñil chinop gek, chin Klays Jisas ayip jimñil midil binib ne koñim midobun.

*Klays ne Juda binib okok ayip, binib Juda mel okok ayip di jimñub*

<sup>11</sup> Nibi binib Juda mel midebim okok, nibi nepim, Juda binib kili wak tibilikipal okok nibop apal, Nibi binib wak ma tibilikipim okok midebim, chin binib wak tibilikipim okok midobun apal. Wak tibilikipun gos niñid apal anib ak, bi kili ke anigipal. Pen nibi gos nigtep ginimib, nibi ned binib Juda mel yeligipim. <sup>12</sup> Ñin anib ak, Klays ayip ma yeligipim. God binib ne Yisiel ma yeligipim, binib yokip okok nep yeligipim. God ne takaw ag adek nokom lil, binib ne okok kilop ned aglak. Pen nibi God binib ne ma midil, takaw nop nigeligipal kid ak ma yeligipim. Binib lum awl yokip okok midil, God nop ma nigeligipim. Pen tap telep olap dil midtep ginigun agil kod ma yeligipim. <sup>13</sup> Nibi God nop pal okok midil, nop yil yenimib tek ma lak. Miñil pen Klays nikim ne sogek kumak tek niñid, apil nop chigil God binib ne midebim. <sup>14</sup> Klays ne ke chinop gek, binib okok kilop jimñil midil midtep

---

**2:9** Lom 3.20, 3.27, 4.2, 1 Ko 1.29-31, 2 Ti 1.9    **2:10** 1 Ko 3.9, 2 Ko 5.5, 5.17, Epe 4.24, Tat 2.14    **2:11** Lom 2.28-29, 1 Ko 12.2, Epe 5.8, Kol 1.21    **2:12** Lom 9.4, 9.8, Gal 4.8, Epe 4.18, Kol 1.21, 1 Te 4.5, 4.13    **2:13** Gal 3.28, Epe 2.17, Kol 1.20    **2:14** Ais 9.6, Mai 5.5, Jon 16.33, Apo 10.36, 1 Ko 12.13, Kol 1.20, 2.14

gipun. Ned ñin ak, Juda binib okok, binib Juda mel okok milik ninid penpen geligipal. Milik nigep anib ak wali tek yek, kili tig asik keke yeligipal. Klays pen kumak tek ninid, wali ak tib walig yokil, Juda binib okok ayip binib Juda mel okok ayip di jimñil lek, binib nokom olap midebal. <sup>15</sup> Ne kumak tek, takaw Mosis ñu kil tikak ak midupsek diyokak. Takaw kiles tikilak ak sek takaw binib ginigel ma ginigel tikilak ak sek, midupsek diyokak. Juda binib jij ak ke, binib Juda mel jij ak ke ma yenigel, ominal gil di jimñil len jij nokom olap yenigel agil, gos anib ak ninid anigak. Pen anigek, chin jimñil midil midtep gipun. <sup>16</sup> Ne mab bak alan kumak tek, jij ominal di jimñil lil God ayip di jimñil lek nim, binib jij nokom olap midebal. Pen kili milik ninid penpen gipal ak, ne kumak tek ninid keligipal. <sup>17</sup> Ne takaw teplep ak dad apil binib okok midupsek kilop agak, Miñil nibi jimñil midil midtep ginimib tek lup agak. Nibi binib Juda mel God nop pal okok yeligipim okok anib agñil, Juda binib kili wulep okok yeligipal okok agñil gak. <sup>18</sup> Klays ne anigak ak nim, God Kawnan ne ak chinop gek, Juda binib okok ayip binib Juda mel okok ayip, chin midupsek jimñil midil Bapi yil ownigun tek lup.

*Chin Klays yil midobun okok, God kal ne tek midobun*

<sup>19</sup> Anib ak tek, nibi binib Juda mel okok, miñil binib man ke okok nib ju apil midebal tek ak ma

---

**2:15** 2 Ko 5.17, Gal 6.15, Epe 4.24, Kol 1.20-22, 2.14, 2.20      **2:16**  
 Sek 9.10, Lom 6.6, 8.3, Kol 1.20, 2.14      **2:17** Ais 57.19, Sek 9.10, Apo  
 2.39, Lom 5.1      **2:18** Lom 5.2, 1 Ko 12.13, Epe 3.12, Hib 4.16, 1 Pi  
 3.18      **2:19** Gal 6.10, Epe 3.6, Plp 3.20, Hib 12.22-23

midebim, binib adek okok ajipal tek ma midebim. God binib ne ned nib okok ayip jimnil midil, binib ne yipid gil midebim. <sup>20</sup> Pen nibi God nibop kal tek gak ak midebim. Jisas kal meg awl nab ayan punilup tek ak mideb, bi Jisas takaw nop dad ameb okok sek, bi God gos ñek agñeb okok sek, kili kal meg punilup tek ak midebal, nibi kal bog tek ak midebim. <sup>21</sup> Klays ne chinop midupsek di jimnil lil, kal meg awl nab ayan tek midil, gol ominal adan midupsek di yenigab. Di yek, God chinop gek, chin kiles timel gil midil, Biawl kal awl ne yibil ak yenigab. <sup>22</sup> Nibi abe Klays ayip chigil midebim okok, God nibop dil binib oginap nop yil midebal okok ayip di jimnil lek, kal tep ne yibil midebim. Pen God Kawnan ne ak kal migam anib ak pel mideb.

### 3

*God ne Pol nop agek, takaw teplep ak binib Juda mel okok kilop agñub*

<sup>1</sup> God nibop gitep yibil gup anib ak tek, yad nibop gos nigilig God nop agnigebin. Yad Pol, Klays Jisas nop wog giñilig, nibop binib Juda mel okok agñi ajen, bi oginap yip dil nag lel midebin. <sup>2</sup> Pen God yip yimug niñid gitep gil, ne nokom agek yad nibop wog giñibin. God wog anib ak yip agak ak, nibi nepim tek lup. <sup>3</sup> God gos ne we gak ak misen lil yip agek, gos anib ak yad nepin. Pen takaw anib ak oginap nibop mij tikesipin. <sup>4</sup> Nibi takaw mij

---

**2:20** Mat 16.18, 1 Ko 3.9-11, Gal 2.9, Lep 21.14    **2:21** 1 Ko 3.16-17, 2 Ko 6.16, Epe 4.15-16, Kol 2.19    **2:22** 1 Pi 2.5    **3:1** Epe 4.1, Plp 1.7, 1.13, Plm 1, 9    **3:2** Kol 1.25    **3:3** Epe 1.9-10, Kol 1.26    **3:4** Kol 1.26-27



tikesipin anib okok niñid nim, Klays wog ne bilel we gak ak nepin tek ak niginigabim. <sup>5</sup> Bilel ñin anib okok, God gos ne we gil midek ak binib okok kilop ag misen ma lak. Miñil pen Kawnan ne ak agek, ne bi Jisas takaw nop dad ameb okok sek, bi God gos ñek agñeb okok sek kilop agek, gos ne anib ak nigtep gipal. <sup>6</sup> Pen gos we gak anib ak anigil mideb. Miñil binib Juda mel okok sek Juda binib okok sek, kili omiñal gil takaw teplep ak nig dipal. Nig dil, Klays Jisas nop jimñil lil nim, God tap teplep ne ñinigab aglak ak dinigabal. Pen omiñal gil kili jimñil wak nokom tek midil, binib jij nokom tek midebal.

<sup>7</sup> God yip yimug niñid gitep gil, yip dil kiles ne ñil kod yek. Kod midakniñ, bi wog giñeb ne ak midil, takaw teplep anib ak agñi midebin. <sup>8</sup> God binib ne okok kili binib awl midebal, yad bi tam nib okok tek midebin ak pen, God yip yimug niñid gitep gil agek, yad binib Juda mel okok kilop takaw teplep ak agñinig ajebin. Takaw teplep anib ak anigil mideb, Klays binib okok kilop ditep yibil gup. Kilop ditep yibil gup anib ak, tap awl teplep yibil mideb, binib okok kili niñid bilok niginigel tek ma lup. <sup>9</sup> Pen God lum awl tap okok midupsek gilak ak, bilel gos ne ginig nig lak ak we gak. We gil mid dad apil, yip dil agek, gos ne we gak anib ak miñil agyikebin. Gos ne anib ak binib okok midupsek kilop agñen, God ginigab ak misen nepal. <sup>10</sup> Pen God ne anigil gos nigup, ensel okok sek tap kiles adekab midebal

---

**3:6** Gal 3.14, 3.28-29, Epe 2.13-19    **3:7** Kol 1.23-25    **3:8** 1 Ko 15.9-10, Gal 1.16, Epe 1.7, Kol 1.27, 1 Ti 1.13-15    **3:9** Lom 16.25, 1 Ko 2.7, Epe 1.9, Kol 1.16, 1.20, Hib 1.2    **3:10** Lom 8.38, 11.33, Epe 1.21, 1 Pi 1.12

okok sek kili niġinigel, God ne bi gos tipagiġ niġup ak mideb. Anib ak tek miñil ñin anib ak, ne binib ne okok kilop agek, kili ensel tap kiles anib okok kilop yomebal. Yomel, ensel tap kiles anib okok kili niġinigel, God ne bi gos tipagiġ niġup ak mideb. <sup>11</sup> Biġel God ne tap anib ak ġinigiayn aġil gos niġak. Pen miñil Biawl ċin Klays Jišas ne wog gek, God gos ne niġak anib ak ġijup. <sup>12</sup> ġijup ak nim, Klays ayip ġimñil nop gos linopun, anib ak tek ma pilikil God yil monmon apil ne ayip midobun. <sup>13</sup> Anib ak yad kiles ġil apin, niġop aġñi aġen, yip ġi timel gel miñel dipin ak, yilik niñid gos kuñay ma niġinimib. Ak niġop binib tep yad aġil miñel dipin.

*Pol ne Epesus binib okok kilop gos niñid God nop agniġup*

<sup>14</sup> Yad Bapi tap anib okok gak ak gos niġebin anib ak tek, nop kiġom yimil agnepin. <sup>15</sup> Ne Bapi awl midakniñ, ċin ġij keke midupsek man ne alañ lum awl midobun. Ne ke agek ċin midupsek midobun. <sup>16</sup> Pen God tap teplep yibil pel ñub ak, nop agnepin. Tap anib okok niñid, nop anib agnepin, Kawnan ne ak niġop kiles ñil kod yek, gos nab niġi pi ak kiles ġil yonimuñ aġil nop agnepin. <sup>17</sup> Pen Klays nop gos niġilig yenimib ak nim, ne nab niġi okok pel yonimuñ aġil God nop agnepin. Tap okok midupsek ġinigiabim ak, God ayip binib okok ayip kilop mapen lil ġinimib aġil God nop agnepin. Nag ak ġakil, am mab ak pag dek, kiles mideb tek

---

**3:12** Jon 14.6, Lom 5.2, Epe 2.18, Hib 4.16    **3:13** Kol 1.24    **3:15**  
 Epe 1.10, Plp 2.9-11    **3:16** Lom 9.23, 2 Ko 4.16, Plp 4.19, Kol 1.11,  
 1.27    **3:17** Jon 14.23, Epe 2.22, Kol 1.23, 2.7

ak nigtep ginimib agil God nop agnepin. <sup>18</sup> Klays ne binib okok kilop mapen lup ak, kilop mapen awl yibil lup. Ak tek ak nibi ayip God binib ne midupsek ayip kiles dil, ne kilop mapen lup anib ak gos nigtep ginimib agil God nop agnepin. Klays ne binib okok kilop mapen lup anib ak, adek awl alarj amil, yi okyarj amil, gol adarj amil gol adarj amil gup, nigginimib agil God nop agnepin. <sup>19</sup> Klays binib okok kilop mapen lup ak, kili midupsek bilok niginigel tek ma lup ak pen, nibi mapen lup anib ak gos nigtep ginimib agil God nop agnepin. God bi tep ke yibil mideb ak pen, nibi ne mapen lup anib ak ninjid, ne tep ke yibil mideb tek yenimib agil God nop agnepin.

<sup>20</sup> God kiles ne ak nab chin okok wog geb ak pen, kiles anib ak chin bilok nigep tek ma mideb. Tap nim akal tek God nop agninjid, tap nim akal tek God ne ginimuj agil gos nopun, anib ak tap yokip. Kiles ne ak tap awl yibil, gos chin ak sikol olap mideb.

<sup>21</sup> Anib ak minek minek, chin God binib ne midil Klays Jisas ayip chigil midobun okok, God yib nop ak pel pelnep dad aplanigun. Yaw.

## 4

*Chin binib Klays yil okok, jimnil wak nokom tek midobun*

<sup>1</sup> Yad Klays nop wog giñen yip nag lel midebin ak, takaw yad ak nigginimib. God nibop aglil, kili gitap yibil gil yip kidek ginigel agil agak. Anib

---

**3:18** Jon 1.16, Lom 10.3, 10.11-12, Epe 1.18, 1.23, Kol 2.2, 2.9-10

**3:20** Lom 16.25, 1 Ko 2.9, Kol 1.29      **3:21** Lom 11.36, 16.27, Hib 13.21      **4:1** Epe 3.1, Plp 1.27, Kol 1.10, 1 Te 2.12, Plm 1, 9

ak yad kiles gil agebin, nıbi nop yıpıd gil yıbil kidek gınımıb. <sup>2</sup> Binıb tam okok tek mıdıł, kabıyam ma junımıb, bınb sayn tep okok yenımıb. Mınel ogınap ownıgab ak, kımıgel jımñıl yenımıb. Ke penpen mapen lıpım tek, penpen dıtep gılıg yenımıb. <sup>3</sup> God Kawnan ne ak nıbop dı jımñıl lek, jımñıl mıdtep gebım. Nıbi anıgil nep yonıgun agıl kiles gem amnımuñ. <sup>4</sup> Chın jımñıl mubwak nokom tek mıdobun. God Kawnan ak nokom mıdeb. God chınop aglıl suk agek, tap telep nokom olap chınop ñek dınıgabun ak kod mıdobun. <sup>5</sup> Bıawl ak nokom mıdeb. Klays nop gos lınıgep ak nokom mıdeb. Ñıg pakñıbun ak nokom mıdeb. <sup>6</sup> God nokom olap, ne bınb okok mıdupsek Bapı kılı mıdeb. Ne bınb okok mıdupsek kılöp kod mıdıł, mıdupsek nab okok wog gup ak mıdıł, mıdupsek nab ayañ mıdeb.

<sup>7</sup> Pen Klays chınop yımug nıñıd gıtep yıbil gup. Anıb ak tek ne yımug nıñıd gıtep gep ne ak nıñıd tıg asık lıl, chınop nokom nokom tap telep olap ñıl kod mıdeb. <sup>8</sup> Anıb ak buk Baybol ak tıkil agak, Ne tıkjakıl adek alañ amılıg, bınb nag lek mıdebal okok kılöp poñıd dad amnak agıl tıkak. Pen bınb kılöp tap telep okok ñak agıl tıkak.

<sup>9</sup> Klays ne tıkjakıl adek alañ amnak takaw agak jıj ak, taydıł tek mıdeb? Nım ned lum mıgan ayañ apıl, tıkjakıl adek alañ amnak agak. <sup>10</sup> Bı anıb ak lum awl apıl, adek alañ tepayañ amnak. Ne bınb

---

**4:2** Apo 20.19, Gal 5.22-23, Kol 3.12-13    **4:3** Kol 3.14-15    **4:4** Lom 12.5, 1 Ko 12.4, 12.11-12, Epe 1.18, 2.16-18    **4:5** Jon 10.16, 1 Ko 1.13, 2 Ko 11.4, Gal 3.27-28, Hib 6.6    **4:6** Lom 11.36, 1 Ko 12.6  
**4:7** Lom 12.3, 12.6, 1 Ko 12.11    **4:8** Sng 68.18, Kol 2.15    **4:9** Jon 3.13    **4:10** Hib 4.14, 9.24

okok sek tap okok midupsek nab ayan midinig, okok midupsek mideb ak nim, wisip adek yi adek oklan amnak. <sup>11</sup> Pen ne ke binib ne okok kilop ditep gil tap telep anib okok ñak. Oginap aglek, bi Jisas takaw nop dad ameb wog ak gipal. Oginap aglek, bi God gos ñek agñeb wog ak gipal. Oginap aglek, bi God takaw telep agñeb wog ak gipal. Oginap aglek, kili Klays binib ne okok kilop kod midil agñitep gep wog ak gipal. <sup>12</sup> Klays gos ne anigil mideb, chinop God binib ne okok giñek, chin wog telep ne anib ak ginigabun. Anib ak tek chin Klays mubwak ne ak midobun okok, gos sek midil kiles gil jak tep gil yonigabun. Ne anigil gos niñid, tap telep ne chinop ñub. <sup>13</sup> Pen wog ne ak amil amil anigil amek, chin Klays nop gos kiles gil liniñid, midupsek jimñil yonigabun. Pen God Ñine nop nigtep ginigabun. Chin anigil nim, ñapay olap awl ginigab tek ginigabun. Klays kiles ne ak dil, ne gup tek kidek gil, ne mideb tek yonigabun. <sup>14</sup> Gak adek anib ak midon agil, ñapay sikol tek ma yonigun. Ñapay tek ma midon nim, bi God takaw agobun agil yepis apal okok, kili yigen dil ñig solwala pagup tek ak chinop ma ginigabal. Kili bi oginap kilop yepis agel takaw yepis anib okok niñid kidek gelak ak pen, <sup>15</sup> chin niñid kidek ma ginigun. Chin binib okok kilop mapen lil, takaw niñid yibil nep aginigun. Anigil mid dad amil, Klays nep mideb tek midil nop chig tep ginigabun. Pen ne kimig chin won midil, <sup>16</sup> chin wak ñin

---

**4:11** Lom 12.7, 1 Ko 12.28, 2 Ti 4.5    **4:12** 1 Ko 12.7, Epe 1.23, 2 Ti 3.17    **4:13** 1 Ko 14.20, Kol 1.28, 2.2    **4:14** Ais 28.9, 1 Ko 14.20, 2 Ko 2.17, Hib 13.9    **4:15** Epe 1.22, 4.25, Kol 1.18, 1 Jo 3.18    **4:16** Kol 2.19

kid tob kid ne okok midobun. Ne chinop gek, chin keke midupsek nop chigil, bi kidil tek jimnil mubwak nokom midobun. Pen ne chinop gek, chin penpen chigil penpen mapen lil gobun. Anigil midil, wog chinop keke aglup tek gon amek nim, midupsek gos sek midil kiles gil jak tep gil midil, Klays mubwak ne awl gil kiles ginigab.

*Chin Klays yil midobun tek, kanib kideyil adek ak kidek ginigun*

<sup>17</sup> Anib ak yad Klays yil midilig nibop kiles gil agebin, binib Klays nop gos ma nepal okok kili pel gipal ak, nibi keligil kidek ma ginimib. Gos kili ak yipid ma gup sawl yibil gipal. <sup>18</sup> Pen gos kili anib ak, kisilim owup kid ak tek mideb. Gos nigtep ma yibil nepal, chibol kilop ak ma asikup. Anib ak tek, kili God pel midep ne ak keligil sen okok midebal. <sup>19</sup> Tap si tap timel gun agil, neben ma dil, tapin monmon gel ameb. Pen chibol kilop tikjakil, tap timel gach kunjay yibil gipal.

<sup>20-21</sup> Pen Klays takaw ne ak nepek nin ak, kili tap timel gipal anib ak tek ginimib agil ma agnilak. Jisas takaw ninid yibil ne ak nibop agnelak, nigtep yibil gipim. <sup>22</sup> Ned nibi gi timel ginigun agil nigeligipim ak, tap anib ak nibop gek, chibol nibop tikjakek, tap yokip okok gil gi timel geligipim. Gem ameb, tap timel anib okok, nibop pisnep gi timel ginig gak. Miñil pen tap timel anib okok keligil, bi kili chech timel gup ak diyokipal tek diyokinimib. <sup>23</sup> Nibi anigil ginimib, gos tep kideyil adek ak

---

**4:17** Lom 1.21, 1 Pi 1.14    **4:18** Apo 26.18, Gal 4.8, Epe 2.12, 1 Te 4.5    **4:19** Kol 3.5    **4:22** Lom 6.6, 8.13, Epe 2.2-3, 4.17, Kol 3.9, Hib 12.1, 1 Pi 4.3    **4:23** Lom 12.2, Kol 3.10

niginimib. <sup>24</sup> Gos tep kideyil adek ak niñid, bi kili chech koñim lipal tek linimib. Pen God nibop gek binib kideyil midil, ne mideb tek midebim. Anigem, binib okok nibop niñid niginigabal, nibi God agak tek nep kidek gil, suntep yibil midil widin midup ne adek ak midtep gebim.

<sup>25</sup> Anib ak chin Klays wak ñin kid tob kid ne okok midobun ak tek, nibi nokom nokom Klays binib ne okok kilop yepis apim ak keligil, takaw niñid yibil ak aginimib. <sup>26</sup> Milik nigenigabim ak, nigtep ginimib. Nibi tap timel gup ak gep tek. Milik niginimib ak, nig midem sub sanjid ma amnimun. <sup>27</sup> Milik nepim anib ak kasek ma keligenigabim, Satan nibop gos timel ñek, timel ginimib tek lup. Nibi nigtep gil anigil ma ginimib. <sup>28</sup> Binib tap si deligipal okok si ma dinigel. Wog kili okok ke kod midtep gil tap midakniñ, oginap binib yingep tek okok kilop ñinigel.

<sup>29</sup> Takaw aginig, takaw timel okok ma aginimib. Takaw tep okok nep aginimib. Binib yokip midebal okok kilop agñitep gem, kiles gil yenigel. Takaw anib okok aginigabim ak, binib niñid gos sek midil kiles gil jak tep gil yenigabal. <sup>30</sup> Nibi God Kawnan ne ak nop gi timel gil miñel ma ñinimib.\* God nibop ñin kidek ak pisnep dinigayn

---

**4:24** Stt 1.26, Lom 6.4, Epe 2.10, Kol 3.10      **4:25** Sek 8.16, Lom 12.5, Kol 3.8-9      **4:26** Sng 4.4, Jem 1.19-20      **4:27** 2 Ko 2.10-11, Jem 4.7, 1 Pi 5.9      **4:28** 1 Te 4.11, 2 Te 3.8, 3.11-12      **4:29** Epe 5.4, Kol 3.8, 3.16, 4.6, 1 Te 5.11      **4:30** Ais 63.10, Lom 8.23, Epe 1.13-14, 1 Te 5.19      \* **4:30** Pol ne anigil gos nigup, chin Klays binib ne okok kilop takaw timel agil, gi timel gipun ak, God Kawnan ne ak nop gi timel gil miñel ñibun. Anib ak Klays binib ne okok kilop anigil ma ginigun.

agil gos niñid, Kawnan ne ak nibop ñub. Ñek nib nepim, nibop pisnep dek nag lep ak keligil, kim amil midtep ginigabim. <sup>31</sup> Chibol timel gek, kabiyam juwil, milik niñid, takaw awl agil, binib agjuwil milik timel yibil yapil, tap timel gipim anib okok midupsek keliginimib. <sup>32</sup> Nibi penpen mapen niñid, pen dek pen dek ginimib. Klays yil midebim okok, God tap si tap timel gipim ak tig walig giyokup anib ak tek, pen niñid keligek pen niñid keligek ginimib.

## 5

### *Milek adek ak ajonigun*

<sup>1</sup> Nibi God ñapay mapen ne yibil midebim tek, ne gup adek ak kidek ginimib. <sup>2</sup> Klays chinop mapen lup tek ak ginimib. Chinop mapen lil, bi kili God nop tap kuy tep owep sibog ñibal tek ak, chinop nen mab bak alañ kumak. Anib ak tek binib okok kilop mapen lilig yenimib.

<sup>3</sup> Pen God binib ne midebim ak, bin si bi si ginigun agil, midupmidup tikjakek gun agil, tap chin ke kunay yibil dun agil, ma yibil niginimib. Nibi binib God yil midebim okok, tap anib okok ma yibil ginimib. Anigem, binib oginap kili niñid nibop takaw ma dinigel. <sup>4</sup> Ñiñlonj lil, takaw timel agil, takaw yepis yepis aginigun agil ma niginimib. Takaw anib ak tek ma yibil aginimib. God nop pen

---

**4:31** Kol 3.8, 3.18-19, Tat 3.2-3, 1 Pi 2.1    **4:32** Mat 6.14, 18.22-35, Mak 11.25, 2 Ko 2.10, Kol 3.13    **5:1** Mat 5.48, Luk 6.36    **5:2** Kis 29.18, Wkp 1.9, Sng 40.6, Jon 13.34, Lom 14.15, 2 Ko 2.15, Gal 2.20, Hib 7.27, 10.10, 1 Jo 3.11, 3.23    **5:3** Lom 6.13, 1 Ko 5.1, 2 Ko 12.21, Kol 3.5, 1 Te 4.3    **5:4** Mat 12.35, Lom 1.28, Epe 4.29



tep yibil aginimib. <sup>5</sup> Nibi gos nigtep ginimib, binib bin si bi si gil, midupmidup tikjakek gil, tap chin ke kunay yibil dun agil nepal okok, kili midebal. Pen binib tap chin ke kunay yibil dun agil nepal okok, kili binib tap yepis sibog nibal tek ak gipal. Binib anib okok midupsek, Klays ayip God ayip kili binib anib okok kilop dil kod yenimil tek ma lup.

<sup>6</sup> Binib tap anib okok gil God takaw tibilikipal okok, ne kilop timel ninid yul awl ninigab. Anib ak kili takaw monmon agil, nibop yepis agnel niginimib tek lup ak, nigtep ginimib. <sup>7</sup> Bi anib okok ayip, ominal gil ma yenimib. <sup>8</sup> Ned maynab okok yeligipim ak pen, miñil Biawl chin ak ayip ajil, milek adek ak midebim. <sup>9</sup> Milek adek anib ak binib okok kilop gek, kili tap gitep yibil gil, God agak tek ninid kidek gil, takaw ninid yibil agil gipal. <sup>10</sup> Pen Biawl chinop nigeek nop tep ginimun adek ak nep ginigun agil gem amnimun. <sup>11-12</sup> Binib kili we gil kisilim nab okok ajil tap timel gipal okok, nib ayip ma ginimib. Tap timel anib okok, binib okok kilop gitep ma gup. Pen kili timel gipal okok, chin anib ak tek takaw anep agun agon, chinop neben gup. Nibi binib anigipal okok kilop agem niginigel, tap anib okok tap timel yibil mideb. <sup>13-14</sup> Milek apek tap midupsek misen lil milek tek mideb, anib ak tek milek apek tap tay we gipal ak misen niginigabal. Anib ak takaw olap agilak,

---

**5:5** 1 Ko 6.9-10, Gal 5.19-21, Kol 3.5    **5:6** Lom 1.18, Kol 2.4, 2.8, 2 Te 2.3    **5:8** Jon 12.36, Apo 26.18, Lom 1.21, 2 Ko 3.18, Epe 2.11-13, Kol 1.13, 1 Pi 2.9, 1 Jo 2.9    **5:9** Gal 5.22    **5:10** Lom 12.2, Plp 1.10, 1 Te 5.21, 1 Ti 2.3    **5:11-12** Lom 6.21, 1 Ko 5.9-11, Gal 6.8, 2 Te 3.6, 3.14, 2 Jo 10-11    **5:13-14** Ais 26.19, 60.1, Jon 3.20-21, Lom 13.11, Hib 4.13

Nad bi wisin kineban ak, tikjakan agilak. Chip kaw migan ak keligil tepayan tikjakan agilak. Anige, Klays milek ne ak nep pakinigab agilak.

<sup>15</sup> Anib ak nibi titay dil ginigabim ak nigtep gil yenimib. Binib gos ma nigepe tek ma ajenimib, binib gos nigepe tek ajenimib. <sup>16</sup> Miñil ñin timel ak mideb, anib ak tek ñin akal tap tep ak ginig, ginimib. Mel ak, ñin chin awl yokip silig padikinigab. <sup>17</sup> Anib ak sawl gil monmon ma ginimib. Biawl chinop nigeke nop tep ginimun adek ak nep ginigun agil, gos nigtep ginimib.

<sup>18</sup> Ñig wayn kiles ak ñibil sawl ma linimib. Anigem nibop gi timel ginigab. Nibi pen God Kawnan ne ak gem, apil nibop bak linimun. <sup>19</sup> Nibi ke takaw aginig, Buk Kimep takaw okok penpen agñilig, kimep Klays yib nop dad aplanub okok agilig, kimep God Kawnan ne ak nibop gos ñek okok agilig ginimib. Nibi Biawl nop kimep aginimib, jonib nibi sek gos nab nibi ayan sek jimñil aginimib. <sup>20</sup> Biawl chin Jisas Klays ayip midobun tek, Bapi God tap okok midupsek ginimun ak niñid, nop minek minek tep agilig yenimib.

*Bi bel okok kilop takaw agup ak*

<sup>21</sup> Klays ne Biawl mideb agil nop muk okok midebim, anib ak tek nibi nokom nokom namam nanay oginap muk okok yenimib.

**5:16** Gal 6.10, Kol 4.5      **5:17** Lom 12.2, Kol 1.9, 1 Te 4.3, 5.18

**5:18** Snd 20.1, Ais 5.11, 5.22, Luk 21.34      **5:19** Sng 33.2-3, Apo 16.25, 1 Ko 14.26      **5:19** Kol 3.16-17      **5:20** Sng 34.1, Ais 63.7, Hib 13.15, 1 Pi 2.5      **5:21** Plp 2.3, 1 Pi 5.5

22 Nibi bin okok Biawl muk okok midebim tek, nigimil sikop muk okok yenimib. 23 Adek anib ak anigil mideb, Klays binib ne okok dil kilop kod mideb tek, bi olap bin ne dil nop kod mideb. Klays binib ne okok kilop tig asik dek, binib ne okok kili Klays mubwak ne midebal. 24 Klays binib ne okok nop muk okok midebal tek, bin okok nigimil sikop pisnep muk okok yenigel.

25 Pen nibi bi okok, Klays binib ne okok kilop mapen lil monmon kumak tek niñid, bin nibi okok kilop abe mapen linimib. 26 Klays ne ñig ak sek takaw ne ak sek dil, binib ne okok kilop ñig li yokil ñil gek God ne nigeke, kili binib suntep ne yibil midebal. 27 Gos ne anigil mideb, binib ne okok kilop gek, kili bin teplep olap tek yenigabal. Gach sek ma midil, anoy silek soy midup ma midil, tap timel anib okok ma yibil yenigabal.\* Yad nigen kili teplep yibil midil binib suntep takaw ma mideb midel kilop dad amnigayn agil, ne kilop nen monmon kumak. 28 Nibi bi okok, bin nibi okok kilop mapen lil anib ak tek ginimib. Wak nibi ke nigtep gipim tek kilop ginimib. Bi bin kili mapen lipal okok, wak kili ke mapen lipal. 29 Chin nopun, bi olap wak ne ak yilik ma nigup. Mel yibil. Ne ke nigeke tep gek, tap midup ñilig ñilig yibil mideb. Klays ne binib ne okok anib ak tek gup. 30 Taynen?

---

**5:22** Stt 3.16, Epe 6.5, Kol 3.18, 1 Pi 3.1      **5:23** 1 Ko 11.3, Epe 1.22-23, Kol 1.18      **5:25** Gal 1.4, Kol 3.19, 1 Pi 3.7      **5:26** Jon 15.3, 17.17, Tat 3.5, Hib 10.10, 10.22, 1 Jo 5.6      **5:27** 2 Ko 11.2, Epe 1.4, Kol 1.22      \* **5:27** Anib ak takaw paladan lil agak. Chin Klays binib ne okok, bin teplep yibil midobun tek, Klays chinop dinigab.      **5:30** Lom 12.5, 1 Ko 6.15, 12.27, Epe 1.22-23

Chin wak ñin kid tob kid ne okok tek midobun. <sup>31</sup> Pen buk Baybol ak tikil agak, Anib ak tek, bi olap nonim nap sikop ayip midil, bin dilig kilop keligil, kili bel jimñil midel wak nokom yibil linigab agil tikak. <sup>32</sup> Takaw we gep anib ak, jij awl olap mideb. Pen yad gos anigil nepin, takaw anib ak Klays sek Klays binib ne okok sek agak ak. <sup>33</sup> Takaw anib ak pen nibop abe agak, bi nibi okok nokom nokom ne ke mapen lup tek, bin ne ak nop anib ak tek mapen linimuñ. Pen bin nibi okok nokom nokom ne nigimil nop biyad agil, muk okok midil ditep ginimuñ.

## 6

### *Nonim nap ñapay okok takaw agup ak*

<sup>1</sup> Nibi ñapay okok, Biawl gos ne anigil mideb, nanim nap sikop aginigel tek nig dinimib. Anigem tep yibil mideb. <sup>2-3</sup> Buk Baybol ak tikil agak, Nanim nap takaw aginimil tek niñid, kilop ditep ginimin agil tikak. Takaw kiles agak anib ak, takaw kiles okok kuñay nab okok mideb ak pen, takaw kiles nokom nim takaw oginap sek jimñil mideb. Takaw oginap sek jimñil anib ak, tikil anigil agak, Nad aniginigaban ak kasek ma kumil, lum awl tapin midil, midtep ginigaban agil tikak.

<sup>4</sup> Pen nap sikop, ñapay nibi okok kilop takaw yilik ma aginimib. Anigem, yilik gek, takaw aginigabim ak ma niginigabal. Pen awl gilakniñ, gos timud wuk tep gilig, God takaw agñi tep gilig yenimib.

---

**5:31** Stt 2.24, Mat 19.5, Mak 10.7-8, 1 Ko 6.16    **5:32** Kol 3.19, 1 Pi 3.6, Lep 19.7    **6:1** Snd 23.22, Kol 3.20    **6:2-3** Mat 15.4    **6:2-3** Kis 20.12, Lo 5.16    **6:4** Lo 4.9, 6.7, 6.20-25, Sng 78.4, Snd 19.18, 22.6, Kol 3.21

*Biawl okok sek bi wog giñeb kili okok sek takaw agup ak*

<sup>5</sup> Pen nibi binib wog giñeb okok, biawl nibi okok kilop pilikil, takaw kili ak nig dil kidek ginimib. Kilop yepis gil wog yokip ma ginimib, wog kiles gil gitep yibil gun agil gos nigimib. Klays takaw ne nig dil wog ne gitep gipim tek, biawl nibi okok abe takaw kili nig dil wog kili gitep ginimib. <sup>6</sup> Biawl okok nig yelakniñ, won anib ak nep wog gitep gon kilop tep gan agil, anib ma ginimib. Nibi Klays bi wog giñeb ne okok midebim anib ak tek, God gos ne nigup ak kidek ginigun agil, biawl nibi okok gos nokom lil wog ginimib. <sup>7</sup> Pen bi okok kilop nep wog gobun agil ma nigimib. Klays Biawl chin ak nop wog gobun agil wog ginimib. Anib ak nibop tep yibil gakniñ wog kiles gil ginimib. <sup>8</sup> Nibi gos anib ak nigim, binib wog giñeb biawl olap muk okok midebal akan, binib wog gep biawl olap muk okok ma midebal akan, midupsek kili Klays Biawl chin anop wog gitep genigabal, kilop nokom nokom pen tap telep ñil ditep ginigab.

<sup>9</sup> Pen nibi biawl okok, binib wog giñeb nibi okok kilop abe gitep ginimib. Takaw kiles agem pilikinigabal ak ma ginimib. Gos nim ak pel nigim, nib ayip binib wog giñeb nib ayip, Biawl nokom man ne alañ mideb ak ne nibop midupsek kod mideb. Pen binib yib mideb akan ma mideb, anigil gos ma nigup. Adip adip midebal ak niñid, pis olap akan pis olap ma amnigab.

*Klays binib ne okok, kili bi chim kadıj gep tek midebal*

<sup>10</sup> Yad takaw won nokom olap mideb ak, nibop aginıgebin. Biawl nibop kod midil kiles ne ñakniñ, kiles awl ne ak dil gem amnimun. <sup>11</sup> Bi chim kadıj gep tap okok God ne nibop ñub ak, nibi dil linimib. Tap anib okok lem, Satan nibop pel yepis agil timel ginig gup ak, pipag yokil, kiles gil jak tep gil yenigabim. <sup>12</sup> Binib okok ayip penpen ma gobun, kicheki walıjpal okok ayip penpen gobun. Kicheki binib okok kilop kod midebal okok sek, kicheki kiles midebal okok sek, kicheki lum awl kod midebal okok sek, kicheki adek oklan kod midebal okok sek, tap anib okok midupsek ñin anib ak kisilim nab okok ayip penpen gobun. <sup>13</sup> Anib ak bi chim kadıj gep tap okok God ne nibop ñub ak, nibi li tep ginimib. Anigem tap timel ownigab ñin ak, jak tep gil penpen ginimib. Kiles gil yibil penpen gil mid dad amil gıjuwil, jak tep gil yenigabim.

<sup>14</sup> Anib ak kiles gil jak tep gil midinig, God takaw niñid yibil ak, sibnag tek pak tibikinimib. God agak tek kidek gipim ak, chech kiles timel sek kadıj tek linimib. <sup>15</sup> God chin ayip jimñil yonigabun takaw telep ak dad amnigun agil gos nepim ak, tob tilup tek linimib. <sup>16</sup> Pen minek minek Klays nop gos linepim ak, kadıj tek dinimib. Dem, Satan yakam ne mab tek yinakniñ ñaginigab okok pisnep sin

---

**6:10** 1 Ko 16.13, Epe 1.19, 3.16, Kol 1.11      **6:11** Lom 13.12, 2 Ko 6.7, 10.4, Epe 4.14, 1 Te 5.8      **6:12** Jon 12.31, 14.30, Lom 8.38, 1 Ko 15.50, Kol 2.15, 1 Pi 5.8-9      **6:13** 2 Ko 10.4, Epe 5.16      **6:14** Ais 11.5, 59.17, 2 Ko 6.7, 1 Te 5.8      **6:15** Ais 40.9, 52.7, Nah 1.15, Lom 10.15      **6:16** 1 Jo 5.4

ginigab. <sup>17</sup> God nibop tig asik dup ak, poj kiles timel sek kadiņ tek linimib. God takaw ne ak, baynat tek dinimib. Takaw anib ak, God Kawnan ne ak baynat ne mideb.

<sup>18</sup> Tap anib okok midupsek gilig, God ayip agilig yenimib. Minek minek Kawnan ne ak nibop gos ñakniņ, God ayip agilig, nop agniġilig yenimib. Pelpel nigtep gil midilig, God ayip aginimib. Pen minek minek nop agniġem, binib ne okok kilop kod midtep ginimun. <sup>19</sup> Yip abe niņid, God nop agniġem yip kod midtep ginimun. Agniġem ne takaw ne oginap yip ñek, yad takaw agiņig, ma pilikil monmon agñinim. Agñil, takaw teplep we gil yoligup ak binib okok kilop ag misen linim. <sup>20</sup> God ne takaw anib ak nep yip ñil agyokek, yad bi nab nib tek ag ajenek, yip nag lelak midebin. Anib ak tek nop agniġem, takaw yip ñil agtep ginimin agek, yad ma pilikil monmon agñinim.

### *Takaw day won oginap*

<sup>21</sup> Bi Tikikus mam tep chin ak, ne bi God nop wog gitep gup ak mideb. Pen yad wog gil titay dil tek midebin ak, midupsek ne amjakil nibop agñinigab. <sup>22</sup> Pen chin titay dil tek midobun ak nibi niġinimib agil, nop agyokebin. Anib ak agyoken am nibop agek niņid, gos sek yenigabim.

<sup>23</sup> Bapi God ayip Biawl Jisas Klays ayip, apilminal nibop gos tep ñinimil. Ñilekniņ, binib kili okok jimñil midil midtep gil, penpen mapen lil, Klays

---

**6:17** Ais 49.2, 59.17, 1 Te 5.8, Hib 4.12, Lep 19.15      **6:18** Mat 26.41, Luk 18.1, Lom 12.12, Kol 4.2, 1 Te 5.17, 1 Ti 2.1  
**6:19** Apo 4.29, 2 Ko 3.12, Kol 4.3-4, 2 Te 3.1      **6:20** 2 Ko 5.20, Plp 1.20, Plm 9-10      **6:21** Apo 20.4, Kol 4.7-8, 2 Ti 4.12, Tat 3.12      **6:21** Kol 4.7-8

nop gos liniñid giniñib. <sup>24</sup> Biniñb miñdupsek kili  
Biawli chin Jisas Klays nop pelpel mapen yibiñl lipal  
okok, God kilop yimug niñid gitep giniñmuñ.



## **Jisas Klays Takaw Telep Ne Tay New Testament**

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

---

PDF generated using Haiola and XeLaTeX on 11 Nov 2022 from source files dated 29 Jan 2022

24d09cce-9a93-523a-afa5-7b091c264cee